

第四冊

光緒朝東華錄

光緒二十一年(公元一八九五年)起
光緒二十七年(公元一九〇一年)止

第四册

光緒朝東華錄

光緒二十一年(公元一八九五年)起
光緒二十七年(公元一九〇一年)止

光緒朝東華錄

光緒二十一年乙未

春正月

¹ 癸酉朔。丑刻。上詣奉先殿行禮。寅刻。詣堂子行禮。辰刻。詣慈寧宮。慈禧端佑康頤昭豫莊誠壽恭欽獻崇熙皇太后前行禮。御中和殿受禮。太和殿受賀。巳刻。詣大高殿。壽皇殿行禮。

² 乙亥。上詣壽皇殿行禮。

³ 命已革提督方崇發馳赴吉林聽候恩澤差委。

⁴ 諭軍機大臣等。定安等奏吉林、黑龍江練軍改步爲馬。大凌河牧羣馬匹不敷挑選。請由察哈爾改撥一摺。著德銘於商都達布遜諾爾暨兩翼太僕寺各牧羣內挑選戰馬二千五百匹。迅速派員解交定安等應用。務須一律臚壯。毋得以疲乏充數。致誤戎機。原摺著鈔給閱看。將此諭令知之。

⁵ 諭裕祿奏查明失守地方各員開單分別參辦。並自請議處一摺。奉天鳳凰城等廳州縣地方各官。均未能竭力守禦。咎有應得。所有單開之劉繼勳等五十九員。均著革職查辦。按律分別治罪。裕祿身膺疆寄。備禦未能周密。著交部議處。餘著照所議辦理。前經降旨將東邊道宜麟、鳳凰城城守尉佑善、署鳳凰廳同知章樾、署安東縣榮禧革職查辦。尙未覆奏。著裕祿迅速拿辦。按律治罪。毋稍遲緩。該部知道。單併發。

⁶ 諭已革直隸提督葉志超。由公州退回平壤後。又復漫無布置。節節潰退。前經降旨拿交刑部治罪。茲據刑部奏稱。葉志超現已解送到部。請旨辦理等語。革員葉志超應得罪名。卽著刑部嚴行審訊。按律定擬具奏。

7 王懿榮奏。臣籍隸山東福山縣。地處濱海。烟臺即其所屬。東距威海百八十里。爲渤海南路緊要關鍵。此地一失。大局瓦裂。撫臣李秉衡。公忠廉介。中外交推。惟履任未久。兵力又單。淮軍水師倚恃李鴻章。不遵該撫約束。故致有榮城失陷之事。臣家有老母。年已七十有三。聞此信神魂飛越。登萊商賈旅食京師者約有三十餘萬人。多。人人有身家之念。海隅有警。兵團不給。衆情惶惑。若市面一空。轉滋搖動。亦必須先有以鎮定其心。臣父前任四川成綿潼龍茂兵備道。先臣祖源於咸豐十年任部員時。曾經督辦山東團練大臣杜翻奏調回籍。專辦登州海疆一帶團練。臣於斯時年已十六七歲。跟隨周歷各口。故與鄉人夙昔洽熟。二三豪俠皆所周知。惟有仰懇我皇上逾格天恩。准臣回籍。會同撫臣辦理團練。兼事招募。惟事機已迫。非有得力軍隊迅速赴援。不足濟急。查現有管帶永興軍記名提督王鴻發。爲臣同祖堂弟。前隨伊犁將軍金順。在新疆西北兩路轉戰二十餘年。刻下同總兵馬心勝所帶馬步八營已抵近畿。臣接其來信。亦深以鄉邦爲亟。憤恨切齒。蓋威海爲天津門戶。威海若再不保。則天津萬無可守之理。避實擊虛。知登州兵力較單。故擾我東防以掣全局。此次由成山登岸者。係倭寇之第三軍。共一萬五千餘人。聞李秉衡電請截留丁槐一軍。已蒙俞允。但營伍尙少。器械未齊。深恐不足以資防勦。亦且緩不濟急。倭寇倘由陸路西擾。則南北阻梗。漕糧軍火接濟不通。何以自立。臣愚以爲留此八營於畿輔。軍力之厚薄不足輕重。而登州兵力未厚。奉天對岸海面。路路可達。若任其游弋。時有擊動。亦萬非李秉衡一人所能奔顧。誠使鴻發馳援威海。或足以保重地而救孤軍。至臣桑梓私念。烏鳥下情。猶屬其小焉者。如蒙俯允准臣回籍。臣即帶同王鴻發星夜馳援。較之遠調他軍。自必親切得力。所有臣迫切下情。不顧冒昧。籲懇皇上俯准施行。則沿海一帶生靈。皆出自聖恩天賜。臣侍直內廷。受恩深重。一俟海氛稍靜。臣將團練事宜歸併撫臣。即行回京當差。不勝悚惶待命之至。上諭。翰林院侍讀王懿榮奏請回籍幫辦團練並請酌帶援兵一摺。王懿榮著准其回籍辦理登州團練事宜。以衛桑梓。至請調記名提督王鴻發。係總兵馬心勝營中分統。此軍已歸牛韓統帶。業經劉坤一調赴榆關。所請著毋庸議。

8 丙子。命廣西副將寶華馳赴山東。交李秉衡差遣委用。

9 丁丑。諭軍機大臣等。李鴻章。李秉衡電奏均悉。戴宗騫進紮虎口山嶺。距長牆十餘里。當倭來路。布置尙屬合宜。連日迎勦倭前隊。均似得手。惟大股將至。勢須合力拒戰。以挫賊鋒。戴宗騫電稱自往督戰。甚屬奮勇。著與劉超佩等同心協力。堅守要隘。毋稍疏失。此時待援最亟。據戴宗騫電有東軍年底退紮就糧猝難折回之語。李秉衡電又稱孫萬林三十至初二等日屢與倭人接仗。其退紮就糧係屬何軍。何人統帶。當此分兵守險聯營進勦之際。著李秉衡迅即查明。飭令趕緊折回助勦。不得稍有諉退。致誤戎機。再。孫金彪現駐烟臺。通商口岸防務較緩。如能調孫金彪一軍。前赴威海協防。更爲得力。著李秉衡體察情形。即行覆奏。

10 諭。御史鍾德祥奏。上駟院卿增潤。與福森布及郎中錫麟扶同作弊。員外郎景昌補缺。由於錫麟賄託。廐長熾昌。於應發銀兩米豆無不剋扣。五圈馬匹不足額數甚多。請飭查辦等語。著懷塔布按照所參各節確切查明。據實具奏。

11 諭。御史鍾德祥奏。請釐正特旨班人員補缺章程等語。著吏部議奏。

12 戊寅。諭軍機大臣等。著李鴻章查通永鎮總兵吳育仁。防守北塘。如果不能得力。即另派勁旅前往。切勿遷就誤事。

13 諭。前據刑部奏革員龔照輿拿解到部。當交刑部嚴訊。按律定擬具奏。茲據御史蔣式芬奏稱。確知該革員委棄旅順實在情形。請歸案訊究等語。即著按照該御史所指各節。歸入前案一併覆訊具奏。

14 諭。巡視北城御史齊蘭等奏。粥廠貧民擁擠斃命一摺。上年十二月三十日。梁家園粥廠照章加放饅首。貧民人數過多。爭先恐後。致被擁斃多名。覽奏殊堪憫惻。業經該城分別查驗撫卹。因思各城皆有粥廠。著各該御史轉飭紳董。嗣後務當妥定章程。盡心經理。並多派人夫設法照料。以全善舉而卹窮黎。

15 己卯。諭軍機大臣等。李鴻章。李秉衡本日電奏均悉。倭隊全向西行。戴宗騫往守北岸三臺。兵少勢孤。危在

呼吸。現惟有嚴飭孫萬林、李楹趕緊馳赴北岸，協同戴宗騫等盡力防守。水路各艦著丁汝昌督率在劉公島及北岸各臺與陸兵依護堵擊。孫萬林等儻再有退避，即按軍法從事。至雷艇管帶王登雲攻燬趙北嘴臺礮藥，丁汝昌遽爲請獎，殊屬非是。南岸全臺俱失，水陸各營皆有應得之咎。現在力保北臺，王登雲儻能奮勇立功，再行核實保獎。此次所請著無庸議。昨據奏稱高場營礮臺打沈倭船一隻，又劉公島打沈一隻，出力將弁著查明獎勵。

16諭。順天府府丞兼學政李培元奏內地擅鎗爲行軍利器，請飭各省設法製造內地火藥，酬以鉅賞等語，著戶部議奏。

17以長萃爲鑲紅旗漢軍副都統。

18福建臺灣鳳山縣旗后南岸礮臺火藥失慎。

19庚辰雪。

20時享太廟，上親詣行禮。

21以張汝梅爲陝西布政使。劉肅爲山西按察使。

22諭。兵部奏遵議甘肅提督李培榮處分請以降二級調用公罪可否抵銷請旨一摺。李培榮著改爲革職留任。即回甘肅提督本任。其所帶防營著歸江西九江鎮總兵宋朝儒統帶。

23辛巳。威海衛陷。

24諭。李秉衡奏特參榮城失守救援不力各將弁請旨懲處等語。上年十二月二十五日倭人由落鳳港登岸，撲陷榮城縣城。該處所駐各營或迎戰不力，或救援不及，均屬咎無可辭。候補副將閻得勝、戴守禮、候補參將趙循發、候補都司葉雲生，試用巡檢徐撫辰五員均著暫行革職，仍令帶罪圖功，以觀後效。其榮城縣失守文武官員並著確切具奏。

25 予故河南光州知州姚國慶列入國史循吏傳。

26 壬午。諭軍機大臣等。李秉衡奏威海失守。請將帶兵各員嚴議。並自請嚴議等語。提督孫萬林。總兵李楹。救援不力。均著交部嚴加議處。李秉衡調度失宜。究因兵單所致。著加恩改爲交部議處。

27 癸未。召張煦入覲。以胡聘之署山西巡撫。

28 予故安徽望江縣知縣王寅清列入國史循吏傳。

29 甲申。諭軍機大臣等。直境各海口緊要。預防固宜嚴密。一聞警信。如何呼應靈捷。合力直擊。使敵不得乘間登岸。著李鴻章迅籌覆奏。

30 乙酉。日人據劉公島。覆我北洋海軍。

31 幫辦北洋軍務大臣王文韶陛辭請訓。慈禧端佑康頤昭豫莊誠壽恭欽獻崇熙皇太后諭令到津後。激勵將士。各矢天良。力圖振作。果能奮勇爭先。殺賊立功。必有不次之賞。倘退縮不前。致賊狂竄。一經查明。亦必有不次之罰。軍情萬緊。卽傳諭各營統領暨關內外統兵大臣一體欽遵。轉飭遵照。該大臣仍將通行宣諭緣由專摺覆奏。

32 丙戌。上詣奉先殿、壽皇殿行禮。

33 諭。自上年軍興以來。朝廷每念從征士卒。冒險衝鋒。勞苦情形。時深軫惻。著各路統兵大臣嚴飭各將領等。於所部兵勇務當優加體恤。以期踴躍用命。倘有尅扣軍餉。虐待兵勇。經朕訪聞或被人參劾。定當執法嚴懲。決不寬貸。該統領等其各懷遵毋忽。

34 丁亥。上詣大高殿、壽皇殿行禮。

35 諭軍機大臣等。邵友濂奏飭聶緝渠馳滬辦理臺灣後路轉運。著暫緩來京陛見。

36 諭。理藩院奏蒙古親王捐輸軍需銀兩請旨獎勵一摺。該親王情殷報効。洵屬急公。科爾沁扎薩克和碩圖

什業圖親王色旺諾爾布桑保著賞換黃驪。

37 辛卯諭軍機大臣等前派張蔭桓邵友濂爲全權大臣前往日本會議條款。詎日本意存延宕。藉勅書有請旨之語。謂非十足分際不與開議。送回長崎。迨令田貝再電詢問。乃又答云。無論何時可以再行開商和議。總須中國改派從前能辦大事位望甚尊聲名素著之員。給與十足責任。仍可開辦等語。現在倭餒鳴張。幾疆危逼。只此權宜一策。但可解紛紜急。亟謀兩害從輕。李鴻章勳績久著。熟悉中外交涉。爲外洋各國所共傾服。今日本來文隱有所指。朝廷深維至計。此時全權之任。亦更無出該大臣之右者。李鴻章著賞還翎頂。開復革留處分。並賞還黃馬褂。作爲頭等全權大臣。與日本商議和約。直隸總督北洋大臣著王文韶署理。李鴻章著星速來京請訓。切毋刻遲。一切籌辦事宜。均於召對時詳細面陳。該大臣當念時勢阨危。既受逾格之恩。宜盡匪躬之義。諒不至別存顧慮。稍涉遲回也。起程日期。並著卽行電聞。以紓廑注。將此由六百里諭令知之。

38 壬辰上御文華殿。各國駐華使臣覲見賀年。

39 予山東陣亡道員戴宗騫祭葬世職。

40 諭吏部兵部會奏遵議處分一摺。山東巡撫李秉衡著照部議降二級留任。不准抵銷。提督孫萬林總兵李楹均著照部議卽行革職。准其留營効力以觀後效。

41 廖壽豐奏浙防正當緊要。辦事需人。請電飭新任臬司聶緝槩卽赴新任。以重職守。上諭軍機大臣等。廖壽豐電奏已悉。著該撫傳知聶緝槩。如無經手未完事件。卽行赴任。毋庸來京陛見。

42 癸巳諭福裕奏假期已滿病難速痊。請開缺回旗調理一摺。奉天現係軍務省分。該府尹行抵中途。屢次藉病奏請開缺。顯係意存規避。奉天府府尹福裕著卽勒令休致。

43 諭德馨奏特參縱勇沿途滋擾之守備請交部議處一摺。廣東候補守備宋鵬飛經李瀚章派令前往皖江招勇赴粵。路過江西蓋城及南康大庾等縣。縱令勇丁沿途捉船毆人。強搶號馬。種種騷擾。該守備並有捏搶訛

案情事。似此縱勇肆擾。貪婪暴橫。殊屬大千軍紀。宋鵬飛著先行革職。由李瀚章派員押解江西交德馨嚴行審訊。按律懲辦。以儆效尤。

44 甲午諭。給事中洪良品奏駐藏幫辦大臣訥欽於去年十一月初六日請訓至今尚未出京等語。著兵部該旗查明具奏。

45 諭。德馨奏拿獲匪目審明懲辦請將出力人員保獎等語。上年正月間圍攻永甯案內匪目邱懷德。潛匿龍泉縣北鄉。經該署縣鄧宜猷會同把總羅慶雲分派兵役團勇馳往掩捕。將該犯拿獲。審明正法。所有在事出力之調署龍泉縣事永豐縣知縣鄧宜猷。龍泉縣把總羅慶雲。即著德馨奏請獎勵。逸犯黃三祥等。仍著飭屬嚴拿務獲究辦。該部知道。

46 諭。前經降旨將失事各員拿交刑部治罪。並迭次飭催速解。除業經拿解到部及准令留營効力各員外。現有趙懷業。衛汝成。黃仕林三人。未經拿解到案。該革員等均屬獲咎甚重。豈容日久潛匿。即著直隸總督安徽江西各巡撫一體嚴拿務獲。速即派員押解來京。毋任逗遛。並著福潤。德馨將趙懷業等三犯家產先行查抄。

47 以善聯爲奉天府府尹。

48 宋慶奏。奴才於光緒二十年十二月初七日在田莊臺行營准軍機大臣字寄。光緒二十年十二月初二日奉上諭。前據李鴻章電奏。葉志超一軍在成歡等處地方接仗獲勝。當經明降諭旨。將出力各員分別獎敘。現在疊次有人奏參該軍捏報勝仗。所保各員且有並未在營者。宋慶覆奏摺內亦云葉志超由公州退回平壤。所報戰狀盡係虛捏。第念聶士成等同時力戰。亦未便沒其微勞。著宋慶將葉志超前次請獎之案確切查明。其實在出力各員仍准給獎外。其餘濫邀獎敘之員。著即奏明請旨撤銷。以昭核實。李鴻章原電著鈔給閱看。將此諭令知之。欽此。遵旨寄信前來等因。奴才查閱李鴻章原電。七月十四日該軍行抵王京西北之京化遇倭戰勦一節。查無實據。惟六月二十七日成歡一戰。斃倭較多。出力各員。自應遵旨查明以昭核實。當行聶士成令其查明成

歡戰勦人員據實聲覆。一面派員訪查去後。茲據聶士成覆函云。記名提督江自康。記名總兵譚清遠。儘先副將馬義和。儘先參將許兆貴。儘先游擊魏家訓。聶鵬程。儘先都司徐兆德。儘先守備王臣。均係在成歡接仗異常出力之員。游擊孫禮達。留防牙山。倭人分兵攻牙。打仗奮勇。記名總兵葉玉標。派赴公州堵禦海口。游擊毛殿揚。都司戴長榮。守備杜俊卿。派駐天安。該處爲成歡公州適中之地。前後策應。未曾臨敵。立功稍次。候選道吳學廉。係派委營務處差使。知府張雲錦。知縣劉長英。金慶慈。縣丞任家祐。皆充當文案。知縣范汝康。係管銀錢所委員。同知史雲。係糧械局委員。均在事出力等情。並據去員查得吳學廉辦理葉志超軍營營務。毛殿揚充行營巡捕。葉玉標爲葉志超遠族。均未督隊戰勦。難免徇情。其所保文員。雖在事出力。並非隨隊勦賊等語。奴才遵查聶士成於成歡接仗。督隊戰勦。復能等候潰隊帶同退回平壤。及所查實在出力之提督江自康。總兵譚清遠。副將馬義和。參將許兆貴。游擊魏家訓。聶鵬程。都司徐兆德。守備王臣。游擊孫禮達等。以上十員。籲懇天恩。仍准照保給獎。其吳學廉。毛殿揚。葉玉標。既涉徇情。未免冒濫。應請旨撤銷。俟軍務肅清。再由原保大臣查明。敘其勞績。另核獎勵。以昭核實。而免冒濫。是否有當。伏候聖裁。上諭。前因在廷諸臣交章參劾葉志超一軍在成歡等處接仗。所報獲勝情形均係虛捏。請將保案撤銷。當諭令宋慶確查具奏。茲據宋慶奏稱。該軍所報行抵韓城西北之京化遇倭戰勦一節。查無實據。其在成歡一戰。提督聶士成督隊戰勦。身先士卒。提督江自康。總兵譚清遠。副將馬義和。參將許兆貴。游擊魏家訓。聶鵬程。都司徐兆德。守備王臣。游擊孫禮達。均係接仗出力。著仍照原保給獎。候選道吳學廉。游擊毛殿揚。總兵葉玉標。未曾臨敵。所保均屬徇情。著即將保案撤銷。都司戴長榮。守備杜俊卿。僅資策應。知府張雲錦。知縣劉長英。金慶慈。縣丞任家祐。知縣范汝康。同知史雲。僅係充當文案等差。並無戰功足錄。所得獎敘。著先行撤銷。俟軍務肅清另行核辦。以昭核實。而免冒濫。該部知道。

⁴⁹乙未。諭軍機大臣等。劉秉璋奏請將代理秀山縣知縣敦習知縣鄭子元革職永不敘用等語。該員貪鄙妄爲。係據川東道黎庶昌稟揭。並未將實在劣跡詳細聲敘。該督遽以革職永不敘用奏請。語意殊屬簡率。究竟鄭

子元有無賊私實跡。著劉秉璋確切查明具奏。再降諭旨。

50 四川建昌鎮總兵劉士奇卒。予祭葬。

51 追予前署貴州興義府知府李保衡列入國史循吏傳。

52 丁酉諭。給事中托佛歡奏參良鄉縣知縣范履福侵吞賑款任用蠹役濫施非刑各節。當經諭令孫家鼐、陳彝確查。茲據查明覆奏。范履福被參各節均無實據。即著無庸置議。惟該員先後兩任良鄉。既招物議。即屬人地不宜。良鄉知縣范履福著開缺另補。餘著照所議辦理。該部知道。

53 刑部奏。光緒二十年十二月二十八日准北洋大臣直隸總督李鴻章及幫辦北洋軍務四川提督宋慶分派委員會同押解已革提督葉志超到部。當經收禁。於二十一年正月初三日以可否簡派大臣會審抑或由臣部按律治罪之處。請旨定奪。奉上諭。已革直隸提督葉志超。由公州退回平壤。並未接仗。迨行抵平壤。又復漫無布置。節節潰退不前。其安州尚有馬步八營可爲策應。該革員並不扼守安州。乃竟退過鴨綠江。實屬統馭無方。大負委任。葉志超著交刑部治罪等因。欽此。遵卽遴派司員從嚴訊鞫。據葉志超供。係安徽合肥縣人。投入淮軍。歷保武職。蒙恩簡授直隸提督。光緒二十年五月間。奉派赴朝鮮勦辦亂匪。抽帶蘆榆兩防兵一千五百名。於五月初八日行抵牙山。六月初間平定匪亂。旋以倭人構釁。牙山四面受敵。正擬移駐公州。倭已大股來犯。適續調蘆榆北塘兵一千八百餘名趕到。革員等因逐移師成歡。突於二十六日夜倭人潛來偷營。當經擊退。俄頃倭兵紛起。數約二萬。彼此對敵。互有傷亡。革員兵寡力瘁。遂退至公州。繼探知倭以大股來攻。因繞道從漢江上游飛渡。由平康行抵平壤。當經電奏自請議處。並爲陣亡諸將領請卹。奉旨。以該員所帶之兵。本爲朝鮮定亂。兵數不多。此次途遇倭軍。雖有傷亡。功過足以相抵。著加恩寬免議處。准其擇尤保獎等因。欽此。嗣於七月二十六日奉旨總統諸軍。自揣力難勝任。恐誤大局。兼以病須就醫。籲請開缺。未蒙恩允。維時革員所帶弁勇三千餘人。先在平壤各軍有衛汝貴統帶之盛軍十二營。馬玉崑統帶之毅軍五營。左寶貴統帶之奉軍馬步三營。豐陞阿統帶

之馬隊盛字兩營。均歸革員總統。當與各統領會商。派衛汝貴駐守平壤。南門外大同江沿。分一營駐江東。派馬玉崑以一營接應盛軍。兼防大同江。並分一營駐紫江東。城內又駐四營。扼守南門。派左寶貴以一營駐南門外。大同江浮橋。作爲接應。派豐陞阿兩營馬隊守七星門。由南門至大西門等處。係革員自統正定軍右營及平壤獵戶合守。其餘各營分段駐守。並挑選各營精銳作爲游擊。至三十三四等日。倭復以全師來犯。各軍分道迎敵。倭人亦經敗退。至十五十六兩日。倭人齊出大隊鏖戰。十六日早。奉軍三營礮臺被毀。左寶貴中彈陣亡。各軍子盡糧絕。倭人搶掠四出。以大礮向城營施放。革員同諸將定議退守安州。詎該處官民逃避一空。兵勇無食可就。復同諸將會商。連原駐各營均退至博川地方。革員又經奏明自請嚴議。蒙恩寬免。革員隨於八月二十三日奏明全軍退回鴨綠江西九連城駐守。至革員到九連城時。連原駐並續到馬步各軍尚有一萬餘人。嗣於九月初五日奉旨撤去革員總統。於二十一日將自帶各營交聶士成接管。聽候查辦。至二十八日九連城失守。革員業經交卸等語。並將歷次電報鈔呈。臣等查葉志超初在朝鮮平定匪亂。其由牙山移至公州及平壤。均不免於潰退。尙可以兵數不多。寬其責備。迨至平壤以後。統計各軍共二十餘營。均歸該革員總統。果如所供。分段扼守。其布置亦可謂周密。何至一遇倭人。全行敗北。況彼此相持不過數日。遂謊爲子盡糧絕。竊恐無此情理。倘謂平壤失利。難以株守。則安州尙有馬步八營。未嘗不可借資保衛。而該革員遽稱官民逃避一空。兵勇無食可就。所供尤不足信。且該革員由公州潰退。業經蒙恩免議。又復畀以總統之任。迭蒙賞賚。在該革員宜如何奮不顧身。力圖効命。乃節節逃避。棄置藩封於不顧。直退至九連城始行停止。其貽誤大局。厥罪誠無可逭。卽宋慶原奏。亦謂該革員由公州退回平壤。並未接仗。惟抱病因循。督勦不力。當撤兵之際。不能按定次序。又不能整隊徐行。直過鴨綠江始止。實無統馭之才。則該革員之漫無布置。恒怯畏葸。可想而知。再三究詰。該革員亦自認統馭無方。辜負天恩。惟有叩求按律懲治。甘罪無辭。應卽擬結。查律載。守邊將帥被賊攻圍城寨。不行固守而輒棄去。因而失陷城寨者。斬監候等語。此案已革提督葉志超。由公州退回平壤。並未接仗。迨行抵平壤。大兵已經陸續調集。該

革員並拜命總統。自應督率諸軍協力進剿。乃一遇敵人卽行潰退。可知其全無布置。且安州亦屬要隘。兼有留駐各營可爲策應。並非無險可守。該革員又復棄置不顧。竟將全軍退過鴨綠江。以致數百里藩封全行失陷。揆其潰退之由。非藉口於力不能支。卽託言係自固藩籬。卒至貽誤大局。非特平壤等處棄置不顧。九連城亦旋即失守。實屬咎無可辭。誠如聖諭（取統）（統馭）無方。大負委任。自應從嚴懲辦。按律定擬。已革直隸提督葉志超。合依守邊將帥被賊攻圍城寨不行固守而輒棄去因而失陷城寨者斬律。擬斬監候。秋後處決。係武職大員。仍恭候欽定。又奏。光緒二十年十一月二十一日奉上諭。前因旅順失守。諭令李鴻章查明總辦船局道員龔照璵。有無潛逃惑衆情事。旋經李鴻章覆奏。請將龔照璵革職留營効力。當經革職。不准留營。惟該革員總理船政工程。兼辦水陸營務。久駐旅順。當倭氛逼近之時。不能聯絡諸軍同心固守。迨船塢失陷。避至煙臺。僅予革職。不足蔽辜。已革道員龔照璵。著卽拿交刑部治罪等因。欽此。復據山東巡撫李秉衡奏參龔照璵等臨敵逃竄貽誤軍機等因在案。當經臣咨催直隸總督迅速派員押解已革道員龔照璵送部去後。旋據該督飭候補知縣吳調鼎於十二月二十七日將龔照璵解送到部。經臣部奏請。案情較重。可否簡派大員會同刑部審訊。或遵照欽奉諭旨按例治罪。是月二十八日奉上諭。已革道員龔照璵。前因旅順船塢失陷。避至煙臺。降旨拿交刑部治罪。茲據刑部奏稱。該革員現已解送到部。請旨辦理等語。龔照璵應得罪名。卽著刑部嚴行審訊。按律定擬具奏。欽此。經臣等由軍機處將李秉衡參摺咨鈔到部。查原摺內稱。該革員督帶水雷等軍。倭犯大連灣時。居民尙可安堵。如故。該革員一聞警信。卽攜眷潛赴煙臺。經該撫訪聞。正往詰問。旋又逃至天津。迫於衆論。折回旅順。不數日仍自潛逃。以致兵民驚惶。軍無鬪志。該革員逃後。其親兵營勇肆行搶掠。因之工匠居民遷徙一空。旅順之失。該革員實爲禍首等語。當卽遴派司員嚴行審鞫。復據御史蔣式芬奏參。去年十月初九日金州失陷。該革道卽於初十日由旅順逃往煙臺。懼東撫李秉衡查問。又逃赴天津。十一日。各廠聞總辦已遁。工匠皆散。營兵紛出擾掠。該革道所部之兵。自劫廠庫料而逃。於是水雷營弁張起龍。斷電綫。攜電箱亦遁。水旱雷兵聞之皆遁。故雖各口伏

水旱雷六百餘具。未嘗一發也。該革道既至天津。經李鴻章面飭令還旅順。至二十四日。該革道仍棄船廠。易便帽絮袍遁入舟船始出口。迴首倭兵猶未至也。行四日始達煙臺。畏東撫不敢上岸。匿廣艇中數日。仍乘豐順商船遁至大沽一摺。光緒二十一年正月初六日奉上諭。前據刑部奏革員龔照璵拿解到部。當交刑部嚴訊。按律定擬具奏。茲據御史蔣式芬奏稱。確訪該革員委棄旅順實在情形。請歸案訊究等語。即著刑部按照該御史所指各節歸入前案一併嚴訊具奏。欽此。臣等復飭併入李秉衡所參各節詳加究詰。據龔照璵供稱。係安徽合肥縣人。同治十年投効北洋製造局當差。由監生捐納府經歷加捐同知。保知府分省補用。光緒十一年捐道員。十六年保二品頂戴。捐指直隸。到省後。調辦旅順船塢工程。刊發總辦旅順船塢事宜木質關防一顆。因與水師陸營均有交涉事件。奏派會辦北洋船海水陸營務處。由前辦船塢工程現任山東登萊青道劉含芳移革員兼辦營務處並無節制各軍之名。水雷營向設管帶一名。幫帶一名。隊長三名。每隊二十名。共水勇六十名。海口門外設水雷三百餘具。後路西岸。自羊頭窪至東岸鹽廠五十餘里。由各營共領旱雷二百餘具。安設各處要路。倭賊初來。聞有本地奸細爲之嚮導。凡後路所設旱雷之處。賊來均未經過。是以未放。旅順向無城池。亦無文武守土職官。後路奏明派姜桂題。程允和兩軍鎮守。前面東西兩岸礮臺係黃仕林。張光等專責。營務處向有護勇二十名。船塢局向有長夫三百名。係專備各船進隔刮漆油底搬運糧件。九月間傳說到處皆有奸細。各兵輪修竣後。稟明北洋大臣暫將長夫按營制改工程一營。即派管帶分哨分棚。派在各處料械庫所。晝夜輪流巡守。以防奸細暗地放火。並將各營寄存廢鎗借撥三百根發給。藉壯聲勢。船塢自十六年開辦以來。計年用存料件約合銀十八萬兩零。革員家眷於九月初十搭商輪到天津。人所共知。並無攜眷赴煙臺一事。十月初九日金州失陷。大連灣相繼不保。是晚正定鎮總兵徐邦道及提督趙懷業同時潰至旅順。士卒數千人。糧餉全無。旅順各軍自辦之糧未到。亦恐糧餉不足。且電綫已斷。津旅信息不通。當日各廠匠人散走。均未到工。隨將廠庫封鎖。彼時統將十分焦灼。公同來局商請革員親身前往乞援。局中由姜桂題代爲照料數日。革員乘海軍雷艇出海。初十日至

煙臺。晤登萊青道劉含芳。籌用民船運糧設法接濟。旋即抵津。將旅順一切情形面稟北洋大臣。求爲速救。始知宋慶業已南下。又奏調章高元一軍赴援。並籌漕米五千四百石及子藥等件裝載鎮東輪船。革員於十四日回旅順。船隔廠庫各處均封鎖如故。並無搶竊情事。惟據姜桂題云。西岸有一處。看守施放旱雷六品軍功隊長張啓林。因將電箱損壞。畏罪帶水勇四名逃去。隨派弁兵安設妥當。其餘各處電箱綫。弁兵照舊看守。當派該管查拿張啓林。不知去向。並無張啓龍之人。倭賊時尙盤踞金州。革員見勢危急。曾勸諸將同心抵禦。十七日。姜桂題程允和兩軍接仗於營城地方。十八十九等日。均與接仗獲勝。二十一日。賊以大隊相犯。各軍痛勦。斬獲甚多。二十四日黎明。賊以巨艦載添重兵。由雙島一帶礮護登岸。又由後路同時猛進。各統領分隊禦敵。自黎明戰至已刻。革員在局。據探稱。賊之鎗礮所擊甚遠。後路西邊礮臺先爲所毀。賊乘勢近逼。後路東邊各臺隨又失陷。革員出局到後山瞻望。當見各軍暫退白玉山。革員回局片時。復據探稱。大隊又爲賊之鎗礮轟散。賊已至局後圍牆。革員見勢難抵禦。遂退至小平島。其時遙見拖帶礮船之遇順輪船及下雷之小船各一艘出口外被倭輪開礮轟擊。本局護勇及工程隊等。當時亦不知奔散何處。革員隨隊回山。路徑崎嶇。以致馬倒墜地。右髀受傷。不能行動。適遇局夫救上魚船。送至煙臺。因髀傷甚重。人事昏迷。當經局夫擡上商輪。送回天津。醫治數日。十一月初六日。稟見北洋大臣。擬面陳旅順船隔失陷情形。因被參奏。未經傳見等語。臣等查旅順失陷。該革員倉皇奔竄。業已承認不諱。惟於賊攻陷金州時。先期潛逃一節。再三究詰。堅供實係前赴煙臺商運糧米。復至天津請援。委非逃遁。其棄置地雷一節。則稱係張啓林因損壞電箱。同水勇逃走。並堅稱旅順未失以前。兵勇併無搶掠情事。臣等詳核案情。該革員既爲商籌糧米起見。李秉衡時駐煙臺。何以並不謁見。李秉衡若非訪查明確。亦未必遽以入奏。所供顯有不實。其製造水旱雷。原爲禦敵。乃敵至而併未一試。且係該革員專責。仍復委罪於人。尤屬支飾。既經欽奉諭旨。交臣部按律定擬。未便任令茹吐其詞。稍寬厥罪。應卽擬結。查例載。防守要隘文武員弁。統帶重兵。畏葸巧避。失守要隘者。照守邊將帥失陷城寨律擬斬監候等語。此案革員龔照琬。委辦旅順船隔工程。會

辦水陸營務處。久駐旅順。責任綦重。其時防守旅順者不下二十餘營。兵力不可謂不厚。雖各營均有將領。該革員併無統率之責。惟係監司大員。且兼辦水陸營務。自應激勵諸將。統籌守禦之策。乃聞倭賊攻陷金州。輒以赴天津請援。托詞逃遁。致安設地雷之張啓林因之奔逃。兵勇亦因之搶掠。迨回旅順後。至數日賊蹤始至。又復不能聯絡諸軍。同心固守。以致船廠不保。旅順全行失陷。該革員復微服逃竄。是其畏葸巧避。致誤事機。厥咎實無可辭。查失守要隘。例不分文武一律治罪。自應按例問擬。已革二品頂戴直隸候補道龔照璵。合依防守要隘文武員弁統帶重兵畏葸巧避失守要隘者。照守邊將帥失陷城寨律斬監候例。擬斬監候。秋後處決。係職官。仍恭候欽定。上諭。刑部奏遵旨嚴訊革員葉志超、龔照璵按照律例分別定擬罪名請旨遵行一摺。已革直隸提督葉志超、已革道員龔照璵均著照該部所議斬監候。秋後處決。

⁵⁴己亥。恩澤等奏。伯都訥烏拉屬界教匪勾結謀叛。當飭全營翼長富順、慶祿撥派隊兵前往搜捕。旋據慶祿率兵拿獲蕭泳清等二犯。據供黨羽極多。果有謀叛重情。訊明後批飭將該犯就地正法。並勒緝在逃教首孟幅山等務獲懲辦。曾於光緒二十年十二月十三日奏請添兵摺內陳明在案。奴才一面多張示諭。解散脅從。嚴拿首逆。必使無處托足。其甘心從逆之賊。相機勦辦。勿任竄擾。節經分飭去後。嗣據靖邊親軍前營營官補用佐領驍騎校保全呈報。十二月初十日。奉派在五常廳東山以內搜捕盜匪。深入險阻十餘日。多有斬擒。旋偵知教匪張九令等聚集三百餘衆起事謀叛。業經竄至吉林府屬之官街並烏拉屬白旗屯地方。焚脅抄殺。居民紛紛遷避。因率帶所部勇丁。於十二日偵蹤追至十六窩棚接仗。而賊逸於溪浪川。裹脅愈衆。列陣對仗一時之久。鎗斃逆匪十數名。後開放小鋼礮三出。賊遂不支。餘衆均乘坐馬爬犁。行駛如飛。敗入樺皮甸子天合慶商號。該商號圍牆異常堅固。四隅建有更樓。逆賊將門閉塞。率衆登樓。鎗礮齊施。抵死抗拒。我軍祇有一百餘人四面環攻。猝不能拔。是以稟由省城增益兵隊。詎時已深夜。幸隨勦之哨官鳳祿、孫長勝等帶兵百名。並委防禦德豐阿帶領馬隊馳至。飭令分兵圍攻。因復開礮轟擊。仍難得手。攻至寅刻。星月將落。該逆乘時啓門衝出。兇猛異常。尤幸我

軍拚死抵禦。奮勇上前。賊不得逞。遂乘時殺入。該匪有由西北牆下穴洞逃竄者。經官軍殺斃六十餘名。生擒五十餘名。奪獲偽木印一顆。偽黃令旗二面。號坎號褂四十餘件。擡鎗鳥鎗土礮一百餘件。騾馬八十餘匹。兵勇受傷者僅四人。訊據獲匪供稱。偽元帥張九令已被此次官軍殺斃。尙有僞主朱承修。僞軍師孟毓奇。即幅山。僞總兵岳祥。教首陳汲幅等分匿黑林子。天成街一帶。統候逼脅入教。各匪到齊之期。攻打省城等語。營官保全飭令認明張九令屍身梟示。遂飭哨官孫長勝等分途搜勦竄匪。旋據哨官鳳祿率兵追至天成街。獲孟毓奇並其子孟阿然。解至法特哈邊門聽候示辦。適翼長慶祿飭據委營總穆隆阿。委防禦慶祥等協同民團。復在黑林子地方將僞總兵岳祥。教首陳汲幅。畢士英。于汲升。李廣祿。曹鴻德等一併拿獲。而朱承修因聞官軍獲勝。陣斬其僞帥僞將多名。且僞軍師孟毓奇等又均已就擒。知事已無成。復爲戚族所逼。無處逃生。遂爲兵勇緝獲。備述孟毓奇妄言運會。推伊爲主。共謀大事。質之孟毓奇。供亦無異。並其宗師劉明由張家口令其來東三省分道傳教。沿途已放教首一百六十四人。責令各領一盤。每盤三五百人不等。其能收至加倍者。或爲總兵。或爲元帥。以天地雲三盤爲據等供。翼長慶祿遂將該逆首等並盤圖邪書飭解到省。經奴才等發交臬司會同刑司吉林府覆訊相符。當因該犯等逆跡昭彰。未便久稽顯戮。隨即批飭擄赴市曹斬決。梟示犯事地方。以昭炯戒。其擒獲陳汲幅等五十餘名。委派分省補用知縣程國鈞會同翼長慶祿就近於法特哈門地方訊明。陳汲幅等四十二名。或係充當教首。鼓惑鄉氓。或係甘心從逆。抗拒官兵。均屬罪大惡極。法難寬貸。亦已批飭正法。至沙海方等十二名。同續獲之趙泉等八名。訊係隨時裹脅。並未入教從逆。取具妥實保結開釋。永定民心。仍飭各文武嚴拿從逆竄匪。續據委營總雙成拿獲李汝生等五名。委驍騎校依陞阿。委章京永林拿獲教首牛長崑。牛春元二名。署吉林府知府員啓章拿獲李金等五名。又經批交司局確審稟辦在案。奴才等查逆犯孟毓奇。爲關內外總教首。造作讖語。妄言運會。聽信逆師劉明。分竄張家口。奉天。吉林。黑龍江三省。誘惑至數萬之衆。推朱承修爲僞主。張九令。岳祥等爲僞帥。約期謀事。逆跡昭著。警報到省。民多惶惑。烏拉總管伯都訥等處急告文書。每日數至。省中所